



Nuugaatsiami upalungaarsimanermi pissutsinik naliliineq

## 1. Aallaqqaasiut

### a. Tunngavigisaq

Arfininngornermi 17. juni 2017-imi Karrat Kangerluanni qaqqamik sisoortoqarpoq. Qaqqap sisoornerani tassaarsuaq pilersinneqarpoq. Minutsit 8-9-t qaangiunnerini tassaarsuup Nuugaatsiaq eqqorpaa, piffissamilu sivisunerusumi (nal. ak. Pingasut missaanni) mallit minnerpaamik 9,3 meterinik portussusillit nunaqarfimmut qaararput.

Brevdato: 28-06-2017  
Sags nr. 2017 - 13757  
Akt. nr. 5683584

Postboks 1614  
3900 Nuuk  
Tlf. (+299) 34 50 00  
Fax (+299) 34 54 10  
E-mail: pan@nanoq.gl  
www.naalakkersuisut.gl

Upalungaarsimanermut naliliinermut matumunnga tunngavigineqarput:

- Qaqqamit nutaamik sisoortoqarsinnaaneranut paasissutissat (GEUS aamma NGI, 21. aamma 22. juni 2017-imeersoq)
- Tassaarsuup sukkassuserisinnaasaanut, taamaalillunilu qaqqap sisoorneranik paasisaqarnermiit tassaarsuup nunaqarfimmut apuunnissaanut piffissaq qisuariarfissaq pillugu paasissutissat (allakkiaq 22. juni 2017-imeersoq GEUS-imit tabel 1-imit ilaqartinneqartoq)
- Nuugaatsiap eqqaani qaqqap sisoornera tassaarsuaqarneralu pillugit GEUS-imit allakkiaq – suliatigut ilisimasat, suliat ingerlaqqinnissaanut inassuteqaatit killiffii (27. juni 2017)
- 27. juni 2017-imi Nuugaatsiami Illorsuarnilu tassaarsuaqarsinnaaneranut ilisimasat (GEUS 27. juni 2017)
- Kalaallit Nunaata avannaata kitaani Karrat Kangerluani ulorianartorsiorfiusumi nakkutigisaasumik qaqqamik sisoortitsinissamut periarfissat pillugit naliliinerit inassuteqaatillu nutartikkat (GEUS 27. juni 2017)
- 28. juni 2017-imi nakkutilliinermi kalerrisaarinissamilu sulianik ataqatigiissaarinermi killiffik (GEUS 28. juni 2017)
- Tassaarsuaqassappat nunaqarfimmi qanoq portutigisumut anngussinnaaneranut paasissutissat. ("Nuugaatsiami tassaarsuarmut najoqqutassiaq (Run up map)" takuuk ilanngussaq 1)

### b. Ulorianartorsiornermut takussutissiat

- Nuugaatsiaq nuunnguami immamut qanittumi nunami pukkingaatsiartumiippoq.

- Pingaartumik juunip ulluisa 17-ianni sisoorfiusumiit 1 km-inik kippasinnerusumi, kisiannili aamma sumiiffinni qajannaakkunaarfiusuni sisoortoqassappat sulit tassaarsuup maliginut ulorianartorsiorartoqarpoq.
- Maannamut ilisimasat malillugit sisoortussat qaammatit arlallit ingerlaarsinnaapput, ilaanneeriarlutik unittarsinnaallutik, tassangaannarlu sisoorsinnaallutik. Nutaamik sisoortoqarsinnaaneranut ullut, sapaatit akunneri, qaammatit ukiulluunniit qassit ingerlassanersut eqqoriarneqarsinnaanngilaq
- Sajuppillattunut paasissutissat, Nuugaatsiamiit takunnissimasunit paasissutissat aammalu najoqqutassiornerit assigiimmik takutippaat, juunip ulluisa 17-ianni sisoorfimmiit qanitaanilu ulorianartorsiorfiusuniit tassaarsuup malingi minutsit 8-9-t ingerlanerini Nuugaatsiamut apuuttussaasut, aammalu mallit sivisuumik qaarartussaasut.
- Juunip ulluisa 17-ianni sisoortumut aammalu 1 km-it missaannik kippasinnerusumi ulorianartorsiorfimmi sisoortoqarsinnaaneranut najoqqutassiornermi takutinneqarpoq, mallit qaararneri 5 – 10 m-inik portussuseqassasut. Asiaq tamatumunnga takussutissianik sukumiisunik suliaqarpoq.
- Juunip ulluisa 17-ianni sisoortumut najoqqutassiat aammalu sumiiffinni takusat (assinit videonillu) assigiikannerput.

## 2. Tunngavissiat

Najoqqutassiani nunallu assingini suliarineqartuni tunngavissat assigiinngitsut naliliinermut matumunnga tunngavigineqarput.

### a. **Tunngavissiaq 1** (Qaqqap sisoortussap annertussusissaatut

naliliiffigineqartumi qarsutsinissap killinga)

Tunngavissiami GEUS-ip sumiiffimmi qajannaakkunnaarsimasumut, juunip ulluisa 17-ianni qaqqap sisoorfiusup kitaani 1 km-it missaannik \_\_\_\_\_ ungasissusilimmut paasineqartumut naliliinera tunngavigineqarpoq. Qaqqap ulorianartorsiorfiusup juunip ulluisa 17-ianni sisoortup affaata missaannik annertussuseqarnissaa naatsorsuutigineqarpoq.

Tunngavissiami ulorianartorsiorfiusup killinga nunap assingani titarnermik tungujortumik nalunaaqutserneqarpoq.

Tunngavissiami Nuugaatsiap annersaa ulorianartorsiorfiusup killingata iluaniittoq takuneqarsinnaavoq.

### b. **Tunngavissiaq 2** (Qaqqap sisoortussap annertussusissaatut

naliliiffigineqartup marloriaataanerani, aammalu immap +1m-imik ulissimanerani qarsutsinissap killinga)

Tunngavissiami GEUS-ip sumiiffimmi qajannaakkunnaarsimasumut, juunip ulluisa 17-ianni qaqqap sisoorfiusup kitaani 1 km-it missaannik ungasissusilimmut paasineqartumut naliliinera tunngavigineqarpoq.

Tunngavissiami qaqqami sumiiffimmit qajannaakkunnaarsimasumit

sisoortussap marloriaammik annertussuseqarnissaa, aammalu immap ulinnerani (immap tininnerani ulinneranilu immap portussusia agguaqatigiissillugu +1m) qaqqap sisoornissaa tunngavigineqarpoq.

Ulorianartorsiorfiusup killinga nunap assingani titarnermik aappaluttumik nalunaaqutserneqarpoq.

Tunngavissiami Nuugaatsiap annersaa ulorianartorsiorfiusup killingata iluaniittoq takuneqarsinnaavoq.

### **3. Ulorianartorsiorfiusup killingata iluani kingunerisassat**

#### **a. Nunami**

Inuit ulorianartorsiorfiup killingata iluani silamiittut imaluunniit illuni najugaqarfinniittut, katersortarfimmiittut, tunisassiorfimmiittut assigisaaniittulluunniit inuunerat ulorianartorsiusapput. Illut ulorianartorsiorfiusup killingata iluaniittut tamarmik annertuumik ulorianartorsiusapput.

Kalerrisaarummik pitsaasumik pilersitsisoqaraluarpalluunniit qimagutsitsinissamat piffissaq naammassanngilaq, taamaattumillu inuit inuunermikkil annaasaqarnissaannut ulorianartorsiornerup annertunissaa naatsorsuutigineqarpoq.

#### **b. Imaani**

Angallatit talittarfimmiittut tassaarsuarmit ajoquserujussuarneqarsinnaapput, aammalu issimasut inuunerat annertuumik ulorianartorsiornerup annertunissaa Tamatuma saniatigut umiatsiat sissamiittut ajoqusingaatsiarnissaat imaanulluunniit avalatsinneqarnissaat ilimanaateqartorujussuuvoq.

### **4. Pinaveersaartitsilluni suliniutit**

Kalerrinermit piffissap sivikinnera mallillu portussusissaat peqqutigalugit pinaveersaartitsilluni suliniutinik, ulorianartorsiornermut naammattumik annikillititsinnaasunik aallartitsisoqarsinnaanngitsoq naliliisoqarpoq.

Immikkut ilisimasallit isumaqatigiillutik qaqqap nakkutigisamik, soorlu qaartitsinikkut sisoortinneqarnissaa inassutiginnngilaat, tamanna qajannaakkunnaarfiusunik nutaanik pilersitsinermik kinguneqarsinnaammat. Sumiiffiit qajannaakkunnaarsimasut nakkutigisamik qaqqap sisoortinneqarneraniit ukiuni qulikkaaril arlalinni nikeralersinnaapput.

### **5. Ikiutitut suliniutit**

#### **Alapernaarsuinermit kalerrisaarinernullu atortut**

Maannarpiaq alapernaarsuinermit kalerrisaarinernullu atortunik, Kalaallit

Nunaanni pissutsinut naleqquttunik misilerarneqarsimasunillu ilisimasaqartoqanngilaq.

Tamatuma saniatigut Japanimi alapernaarsuinermit kalerrisaarinernullu atortunut misilittakkat takutippaat, alapernaarsuinermit atortut kalerrisaaruteqarneranniit kalerrisaarinerup innuttaasunut anngunnissaanut sivikinnerpaamik minutsit tallimat ingerlanissaat naatsorsuutigineqassasoq. Piffissaq taanna minutsinit arfineq pingasunit, qaqqap sisoorneraniit mallip nunaqarfimmut apuunnissaanut piffissaliunneqartunit ilanngaatigineqassaaq. Taamaalilluni tassaarsuup sinerissamut apuunnissaanut kalerrisaarisooqarpat innuttaasut qimaanissamut taamaallaat minutsinik pingasunik piffissaqassapput. Tamanna pissutsit pitsaanerpaagaluarpataluunniit pitsaasunik qimagutsitsinissamut piffissaliutissallugu piviusorsiunngilaq.

## **6. Upalungaarsimasut**

Pisoqartillugu najukkami upalungaarsimasut nunaqarfiup sinneranitulli annertuumik ajoqusersimassasut ilimagisariaqarpoq. Taamaattumik upalungaarsimasut taamaallaat killeqartorujussuarmik ikiuinermik suliaqarsinnaapput.

Avataanit ikiortissat Nuugaatsiamut tikinnissaannut piffissaq sivilaarsinnaavoq. Taakkununga ilanngullugu sila avataaniit ikiuiartortut piffissamut tikiffissaannut isumaqangaatsiarsinnaavoq.

## **7. Kalaallit Nunaanni Upalungaarsimanermit Ataatsimiititaliap naliliinera**

Kalaallit Nunaanni Upalungaarsimanermit Ataatsimiititaliap upalungaarsimanermik naliliinermini oqaatigaa, Nuugaatsiaq maanna atugassarititaasut tunngavigalugit suli ulorianartorsiorfittut isigineqartariaqartoq. Tamatuma kingunerisaanik Kalaallit Nunaanni Upalungaarsimanermit Ataatsimiititaliaq naliliivoq, maanna tunngaviusut tunngavigalugit innuttaasut Nuugaatsiamut utertariaqanngikkallartut. Alapernaarsuinermit kalerrisaarinernullu atortunik pitsaasunik atulersitsisoqaraluarpalluunniit, naliliineq taanna allanngortinneqassanngilaq, pingaartumik piffissamut kalerriiffissamut mallillu portussusissaannut paasissutissat eqqarsaatigalugit.

Ilanggussaq 1 – "Nuugaatsiami tassaarsuarmut najoqqutassiaq (Run up map)

